



Ս Ո Վ Ե Տ Ա Կ Ա Ն Գ Ա Յ Ա Ս Տ Ա Ն Ո Ւ Մ

ԱՐԺԵՔԱՎՈՐ ՆՎԵՐ ՀԱՅԿԱԿԱՆ ՍՍՌԻ ԳԻՏՈՒԹՅՈՒՆՆԵՐԻ ԱԿԱԴԵՄԻԱՅԻ ՊԱՏՄՈՒԹՅԱՆ ԹԱՆԳԱՐԱՆԻՆ

Հայկական ՍՍՌԻ Գիտությունների Ակադեմիայի Պատմության թանգարանը իբրև նվեր ստացավ Կիլիկիայի հանգուցյալ Կաթողիկոս Գարեգին Հովսեփյանի արխիվից 3 տակյա, 6 արծաթյա և 1 պղնձյա դրամներ:

Ոսկյա դրամներից մեկը կտրված է Մակեդոնիայում (336—318 թ. թ. մեր թվագրությանից առաջ), Ալեքսանդր Մակեդոնացու անունով, մյուսը հռոմեական է և պատկանում է կայսր Վեսպասյանին (69—79 թ. թ. մ. թ.), իսկ երրորդը՝ միջնադարյան մուսուլմանական դինար է՝ կտրված Խորասանի Նիշաբուր քաղաքում Մազանդարանի շահ Ռուստեմ Իբն-Ալիի կողմից, հավանաբար հիջրայի 551—552 թ. թ., որը համապատասխանում է մեր թվականության, 1157—1158 թվականներին:

Պետք է նշել, որ Մազանդարանի շահերից, ընդհանրապես, մեզ հասած դրամները խիստ հազվադեպ են, իսկ վերոհիշյալ դինարը գոյություն տւնեցող հատ ու կենտ օրինակների շարքում մի բոլորովին նոր տեսակի է:

Արծաթ դրամներից մեկը պատկանում է Հռոմի կայսր Մարկոս Ավրելիոս Անտոնինո-

սին և կրում է իր վրա նրա «Արմենիկոս» մականունը (161—189 թ. թ.): Մնացած արծաթ դրամներից չորսը պատկանում են Կիլիկիայի հայոց թագավոր Լեոն երկրորդին (1198—1219 թ. թ.), ըստ սրում, դրանցից մեկը խիստ հազվագյուտ է:

Ուշագրավ է նաև Տրապիոնի կայսր Ալեքսիոս երկրորդի (1297—1330 թ. թ.) արծաթյա դրամը, որպես եզակի օրինակ մինչև այժմ մեզ հասած նրա դրամների մեջ:

Պղնձյա դրամը բյուզանդական է, դժբախտաբար մաշված, և վերաբերում է մեր թվականության 7-րդ դարի առաջին կեսին. հավանաբար աջ պատկանում է Հերակլիոս կայսեր և նրա որդի Հերակլիոս Կոստանդինի իշխանության տարիներին:

Վերոհիշյալ դրամների մեծ մասը պահպանված է շատ լավ վիճակում:

Հազվագյուտ դրամների այս փոքր հավաքածուն նշանակալից ավանդ է Հայկական ՍՍՌԻ Գիտությունների ակադեմիայի Պատմության թանգարանի դրամագիտական ժողովածուի համար, ուր այդ դրամներից մի քանիսը բացակայում էին:

